

'Sta storia pari teccia 'na favula e tecchia vera 'nquantu a ognunu di natri po capitari di 'nnamuràrisi di 'n'amica ca canusciuta nicaredda cu lu passari di l'anni dd'amicizia, criscennu diventa murbusa a tali puntu di 'nnamuràrisi. Chistu succedi a du pirsuni di età matura, tutti du maritati cu figli.

Iddu da tempu cci vulissi diri ca senti quarchi cosa cchiossà di l'amicizia, ma nun trova ma lu giustu mumentu pi diricci 'stu novu sintimentu ca nascì pi idda, anchi pirchè nun voli criari cuntrasti nni la famiglia d'idda e anchi nni la propria. Pàssanu tantissimi anni ma nun succedi nenti, nni l'ultimi tempi lu disidèriu di abbrazzalla va criscennu e tecchia pi scherzu e tecchia seriamenti cci dici ca la voli tantu beni e cci fa capiri ca vulissi quarchi cosa chiossà di l'amicizia.

Idda si limita sulamenti a diricci ca lu voli beni vidè, ma nun si capisci si è d'accordu a li vari pruposti chi cci fa iddu. Ormai juncì lu mumentu di diricci la virità e 'nun mumentu particolari, iddu, grapi lu cori e cci cunfessa tutti cosi.

Idda sorpresa l'ascuta attentamenti ...

A 'stu puntu!

Eccu, arrivatu a 'stu puntu, t'addiri la virità, tutta la virità. È 'na vita ca ti vogliu beni, ti l'haiu fattu capiri e ultimamenti ti l'haiu dittu ca tu si la pirsuna ca vogliu beni chiossà di tutti. Ti pensu minutamenti, ti pensu matina, mezzornu e sira, a la matina m'addivigliu cu ddù desidèriu di abbrazzàriti, di vasàriti, d'accarizzàriti, t'haiu sempri d'avanti li me occhi, trasisti pi dirittu nni lu me cori. Capisciu ca è 'na cosa un pocu cumplicata, ma si dici: "A lu cori nun si cumanna", a 'stu puntu ti l'addiri ... aspetta ca pigliu sciatu ... iu sugnu 'nnamuratu di tia, TI AMU, eccu ti lu dissi, ora pozzu parlari cchiù liberamenti. T'amu, cu tuttu lu cori, capisciu tutti cosi, ma li cosi stannu propriu accussi. Si vuliri beni, si amari, significa guastari tutti cosi, allura 'stu caspita d'amuri chi è? Unu a va èssiri privu di diri a natra pirsuna ca l'ama? Cci sunnu atri pirsuni ca dimostranu affettu, cumprinsioni, cullaburazioni, emozioni e atri cosi 'mportanti pi putirisi amàrisi. Di tuttu chistu però nun sacciu tu chi nni pensi, tu m'hai dittu ca mi vo beni, ma nun sacciu si mi ami, pirchè di vuliri beni a d'amari, cc'è un passu granni quantu lu mari.

"Ntisi 'sta to sincera, piacevoli e miritevoli cunfissioni e comu t'haiu dittu tanti voti, t'haiu voluto e ti vogliu beni puru iu. Ti canusciu di nicaredda e mi veni difficili pinsari ca tu, a mia caru, comu amicu fraternu e dicissi quasi paternu, un jornu m'avissitu dittu ca si 'nnamuratu di mia e chi addirittura mi ami.

Certu, nun t'ammucciu ca mi fa piaciù sèntiri d'iriti e cunfissarimi 'stu to amuri, pi nnà fimmina sèntisi disidirata e amata è troppu suddisfacenti e troppu passionali a tali puntu di capiri e giustificari la to cunfissioni.

Tu si maritatu cu figli e puru iu lu sugnu, quali putissi èssiri lu nostru futuru?

tuttu nigativu, ammessu ca iu t'amassi puru. Pi la to età avanzata e pi la me ancòra giovani, comu putissimu stari 'nzemmula? Hai pinsatu a la to famiglia? A la me? Si spasciassiru tutti cosi, li figli, li parenti, l'amici, canciassiru tutti cosi, fussi 'na vita

diversa, nun fussi cchiù 'na vita tranquilla, 'na vita normali e tutti cosi issiru a finiri mali, anchi l'amuri ca tu dici di aviri pi mia.

Ora ca nni parlamu, dicissi ca ti amu puru iu, pirchè l'amuri è un beni priziusu e cu l'avi e lu voli rigalari e miritevuli d'èssiri amatu. Ma la vita nun lu pirmsetti, la rialtà, è troppu diversa. Criscemu 'nzemmula ma ognunu nni la propria casa, nn'amu vulutu beni e chistu mi gratifica, ora mi dici ca m'ami e chistu mi fa sèntiri cchiù fimmina, in quantu la vita cumporta tanti brutti cosi e sèntisi amata è mutivu di lodi. Lu to duci pinseru versu di mia l'accettu cu piaciri e dicissi puru cu passioni, pirchè anchi a mia piacissi èssiri vasata, accarizzata di tia, pirchè, nun m'ammucciu a dillu, un pinzeru passionali lu fici puru iu versu di tia, ma la fimmina è sempri cchiù prudenti e sapi ammucciari beni li propri emozioni".

Ma dimmi 'na cosa, chi mali cci fussi si quannu nni vidissimu 'n'abbrazzàssimu e ni vasàssimu comu du amanti? Chi mali cci fussi? Gudissimu sulamenti di dd'affettu riciprucu c'avemu. Pi mia chistu fussi un sognu c'haiu avutu di tantu tempu, di quannu ti vidiva crisciri, pirchè è di tannu ca t'haiu vulutu beni, ma tannu era un beni sinceru e amichevuli, ora 'nveci addivintà 'na fissazioni, nun c'è un minutu ca nun ti pensu. Comu ti dissi, ormai si dintra lu me cori, dintra la me vita. Capisciu ca succidissi un patratàcchiti, ma comu a fari iu? Comu a 'stari mutu senza diriti T'AMU, comu a risistiri senza accarizzàriti e vasàriti nni 'sta vuccuzza tantu disidirata. Chi campu a fari senza putiriti tèniri pi manu. Quantu beddi voti amu caminatu 'nzemmula mani manuzzi 'nta la spiaggia e ghìrinni vasannu, firmarinni 'nta un scogliu e l'atru e fari l'amuri. Quantu beddi voti amu passatu notti d'amuri. ma chistu ha succidutu sulu nni la me menti, sulu nni lu sonnu, sulu nni la fantasia.

"Beddu miu, chi vo ca ti dicu, iu vulissi accuntintàriti, ma comu fazzu? Anchi si vulissi comu avissi a fari? Anchi a mia piacissi, ma nun si pò, cridimi, nun si pò. Iu haiu la me vita e tu hai la to, cuntinuamu pi comu amu fattu a vulirinni beni, cusà un jornu un ventu tramuntinu purtassi a ùnciri 'sti nostri labbra, a ùnciri 'sti nostri cori, a ùnciri 'stu desideriu cu lu me.

Pi mia fussi un sognu abbrazzàriti e ancora di cchiù vasàriti 'nta 'sti labbra, figùrati po a fari l'amuri! Fussi comu addivigliàrimi di un beddu sognu e vidiri la rialtà di natra manèra, nni dda manèra di vulirisi beni, di amarisi 'n'ogni qualsiasi sorta di cuntrarietà, di avvirsità, di nigatività. Vincissi l'amuri e allura chi facissi bonu a vènniri, canciàssimu lu munnu, l'usi, li custumi, cci amàssimu, macàri a l'ammucciuni, ma triunfassi l'amuri".

Chi li to paroli issiru 'ncelu, anchi si nun facemu nenti chistu chi dicisti mi vastà, si 'na fimmina di 'na 'ntelligenza 'nfinita, pirchissu iu t'amu.

Ti vulissi tèniri stritta 'nta li me vrazza, abbrazzàriti e vasàriti di cuntinuu senza firmarimi mancu un minutu, vulissi tràsiri 'nta lu to cori e capiri tanti cosi, vulissi vasàriti 'st'occhi ca mannu taliatu sempri comu amicu, e ma comu amanti, vulissi canciari la to menti e fàricci capiri ca amàrisi è na cosa prufundamenti bella e a cu cci

capitassi 'sta furtuna di nun farisilla scappari. Nni 'stu mumentu mi sentu riccu, riccu d'amuri, e vulissi fari 'na rigalia, vulissi rigalariti st'amuri, 'st'amuri puru, 'st'amuri sinceru, 'st'amuri ca nun è facili avillu e rigalallu a la pirsuna ca s'ama.

Oi mi sentu cchiù forti, cchiù giovani, cchiù beddu, appuntu pi stari 'nzemmula cu tia e fàriti capiri ca l'amuri sùpira ogni barriera, ogni ostaculu e attuppa li vucchi di li mali linguì, chiddi ca spàrlanu sulamenti pi 'mmidia, pirchè nun nnè di tutti vulirisi beni e amàrisi sinceramenti.

"Caru miu, lu to cori è limpidu, sinceru e chinu d'amuri, ma nun nnè pi 'sta terra, chiddu ca tu vo è troppu pirsunali, lu munnu va diversamenti, ci sunnu li cumandamenti di rispittàri, cci sunnu li règuli, cc'è lu distinu ca ognunu di natri avi. Anchi iu oi mi sentu cchiù forti e pi chissù ti dicu di fari iri la vita pi comu va, nu mèttiri lu vastuni nni un sciumi unni l'acqua scinni libira versu lu mari, ostaculassitu lu so camminu. parissi cuntradittoriu chiddu ca 'staiu dicennu, ma nni la rialtà è lu cori ca mi lu suggerisci. Certu di 'sta storia ca pari tecchia 'na favula e tecchia vera, mi 'staiu appassionannu e quasi, nun mi dispiacissi accittari lu to 'nvitu, la to pruposta, la to cunfissioni. Nni sugnu partecipi a lu màssimu, nni 'stu mumentu t'abbrazzassi, ti vasassi cu gran voglia e passioni, ti facissi capiri ca anch'iu t'haiu disidiratu e ora fussi lu giustu mumentu di cuncèdimi a tia e lassarimi fari chiddu ca tu hai sempri disidiratu. Dunassi a tia l'amuri ca tu hai sempri sunnatu, ti dunassi lu cori, l'anima, ti dunassi tuttu di mia, finu a quannu ti calmassi 'st'ardiri, 'sta passioni".

Chi fimmina! Si 'na cosa di bellu! Si chidda ca iu vulissi e chi haiu sempri disidiratu, fa avvirari tuttu chistu chi dicisti, fa ca 'st'amuri s'avvirassi. Videmu chiddu chi cc'è di fari pirchè cchiù tempu passa e cchiù la vichiaia s'avvicina e nenti po haiu di dàriti, perciò allistèmoni e facemu chiddu chi li nostri cori cumànnanu. Circamu di fari li cosi beni e senza pindimenti, pirchè nni 'sta vita, nun cci resta nenti. Lu veru fattu è ca iu sugnu ancora cu la vucca asciutta e lu cori vacanti, fatti forza e fatti avanti pirchè si dici ca si voli la fimmina la cosa si fa, ma si la fimmina nun voli po scattari a tutti lu cori ca la cosa nun si fa.

"Caru miu, la to menti va oltri, la storia è bella a lèggila, ma la rialtà è tutta 'n'atra cosa, valutàmu li fatti, tu vo ca fazzu iu lu primu passu, lu facissi! Eccomu lu facissi! Lu cori mi dici di si, ma la ragioni mi dici di no, perciò è lu tempu a dicidiri, lu tempu fu cchiù tirannu cu tia, ti proibbì di parlàrinni, ma fu lu tempu stessu ca oi ti detti l'opportunità di cunfissariti, di gridari l'amuri ca hai pi mia e d'è lu tempu ca metti 'nzemmula passatu, presentu e futuru, lu tempu è capaci di fùnniri 'sti du nostri cori nni un singulari e unicu giuiellu 'n'cui l'amuri supira li cunfini di l'immaginazioni, di la fantasia e oltripassarà miliuna di pianeti di l'immensu universu.

Nun pozzu chiamàriti amuri, ma caru si, allura ti dicu cu tuttu lu cori ca si mi vo, pigliami ora, propriu ora, sùbitu, sugnu pronta, pigliami pi manu, portami unni vo tu, luntanu di 'stu 'ngannu, luntanu di 'sta facciularia, luntanu di 'st'òdiu, portami unni lu

to cori sapi di stari beni, nni la tranquillità, nni l'amuri, fallu ora, fallu sùbitu, dumani nun sugnu cchiù pronta".

Bedda mia ma comu fazzu! Semu luntanu, ora nun pozzu, nun ti pozzu pigliari la manu e purtàriti cu mia, dammi tecchia di tempu, dammi 'na stizza di spiranza, dammi lu tempu d'arrivari a lu to cori. Ma pirchè 'sta vita a va èssiri accussì crudeli, a quannu a quannu è dicisa, mi manca lu tempu p'arrivàricci. 'Stu tempu!

Allura è veru, è iddu ca dicidi tutti cosi, ma chi caspita m'haiu tinutu dintra di mia 'st'amuri, pirchè nun ti l'haiu dittu prima? Sugnu cuntenti e filici di sapiri ca tu anchi pi un mumentu fusti pronta e mancà pi mia èssiri prisenti, ma nni 'sta storia sugnu sempri iu a ristari cu l'occhi chini e li mani vacanti. Nu sacciu si chièdilu a tia o a lu tempu, vulissi ca mi dàssivu tecchia di spiranza, ma propriu tecchia', un spiragliu di luci, quantu m'abbastassi pi gràpiri la porta di lu to cori e ristàricci pi sempri. Nun capisciu 'na cosa, pirchè nni 'st'amuri cci hannu a èssiri tutti 'sti cumplicanzi.

"Lassavu lu me cori cu un spiragliu apertu, oi nni lu me cori tu siminasti un semi, ora sta a mia tenilu caru ammucciatu a tutti e aviricci cura, ha sapiri ca la spiranza è l'ultima a murìri. Sicuramenti cu 'sta to cunfissioni chi mi facisti, raffuzzasti lu me pinsèri a vuliriti chhiù beni. Antùra ti dissi ca mi sintiva cchiù forti, ora, 'nveci, mi sentu debuli, mi sentu sula, mi sentu tristi, e propriu quannu sugnu tristi, arrivi tu cu nna frasi, cu un surrisu, cu un sacciu chi è, ca mi metti alligria e canci la tristizza nni armunia, 'n'musica. Comu fazzu a nun dèriti ca ti vogli beni, comu fazzu a nun dèriti ca si l'unicu ca fa filici la me jurnata di primu matinu, dànnumi un duci bongiornu. T'avissi amari sulamenti pi chissu, ma pi l'amicizia chi ce'è tra di natri, nun ci penzu e passu avanti, nun accurgènnumi di li to amurevuli frasi ca mi dici babbianu, di li vari mitàfuri d'amuri ca mi scrivi, di li tanti vasati virtuali chi mi duni, ma stupidamenti iu nun cci fazzu casu, o macàri nun cci dugnu l'impurtanza ca mèritanu 'sti paroli ricchi di sintimentu, di passioni".

Piccamora ti dassi milli vasati, ti facissi milli carizzi, mi sentu strallunatu di tuttu chiddu chi dici, mi sentu n'omu furtunatu d'aviriti canusciuta, ora, l'amuri chi haiu pi tia ha centuplicatu, ora mi sentu di gridari T'AMU, lu vulissi gridari cchiù forti pi fallu sèntiri a tuttu lu munnu, ma non lu pozzu fari pirchè la vita nun voli, pirchè lu tempu nun voli, pirchè tutti nun vonnu, pirchè si lu gridassi, succidissi un manicomiu, Purtroppo haiu ancora assà di sòffriri, ma comu dici tu "la spiranza è l'ultima a murìri". Si iu campu, campu pi tia e mi dispiacissi viramenti si nni 'sta vita tirrena nun ti dassi mancu na vasata, fussi comu un zoppu ca cci manca lu vastuni, fussi comu un miupi ca cci mancanu l'occhiali, fussi comu 'na lampadina furminata. Sinceramenti ti dicu ca comu mi 'staiu confissannu cu tia nun maiu confissatu ma cu nuddu, chiddu chi ti dicu è tutta virità.

"A 'stu puntu ti chiedu sulu di placàri 'sta frinisia, 'stu disideriu chi hai pi mia, pirchè nun vidu nni la rialtà comu alliggiriri 'sti to pinzeri passionali, anchi si cci fussi lu me

cunsensu nun vidu comu fari, aspetta, rifletti, rènnti cuntutu di la situazioni 'ncui ti trovi, è troppu difficili sia pi tia ca pi mia, nun semu cchiù picciutteddi, semu pirsuni adulti perciò la ragioni a va èssiri a lu primu postu. Mi dispiaci sèntiri ca soffri pi mia, vogliu ca tu stàssitu beni cu tia stessu, cerca di nun pinzàrimi, cerca di taliàrimi cu n'atru occhiu, nun nnè facili, ma pròvacci".

A 'stu puntu nun sacciu cchiù comu m'accumpurtari, capisciu chiddu chi mi dici e mi piaci ca parlàmo pani pani, vinu vinu, ma pensu e ripensu ca si lu facissimu lu sapissimu iu e tu, nun lu sapissi nuddu, perciò quali prioccupazioni ci fussi?. Iu nun vogliu distruggiri la to famiglia, ansi, vogliu ca tu vivi filici, tranquilla e sirena, accussì cume penzu iu cu la me famiglia, pi mia la famiglia è sacra, perciò ognunu a va stari a lu so postu, ma tecchia pi natri cci a ma pinzari vidè, Si nun vo ca soffru, allura vidi ca fari, cummenciti, libirati di 'sti tabù, libira lu to cori, grapri 'sti vrazza e pigliati tuttu lu beni, tuttu l'amuri, chi io haiu pi tia.

"Lu tempu e lu cori pi natri su l'Àngili custodi ca cci portanu nni la giusta via, si 'st'affettu, 'st'amuri a va sciuriri, sugnu sicuru ca sciurisci, po, a ma èssiri natri a riguardàricci beni pi nun ruvinari chiddu chi cci stà 'ntornu e fari lu modu di alimintari 'st'affettu, 'st'amuri jornu dopu jornu cu cchiù passioni. Iu t'haiu voluto e ti vogliu ancòra cchiù beni, pi mia aviri lu to amuri è sempri onuri, speru sulu ca vincissi l'amuri.

L'amuri chi iu haiu pi tia è sempri cchiù forti, pregu e speru sulu di nna bona sorti.

2018 Giuseppe Cardella